



Här Fernand Etgen
President vun der Chamber
Lëtzebuerg, de 6. Juli 2022

Här President,

Esou wéi den Artikel 80 vum Chambersreglement et virgesäit, bieden ech Iech, dës parlamentaresch Fro un den Här Minister fir Educatioun, Kanner a Jugend weiderzeleeden.

Op der traditioneller Rentréespressekonferenz, den 13. September 2021, huet den Här Minister fir Educatioun, Kanner a Jugend déi nei Ausbildung „DAP Education“ an der Formation professionnelle ugekënnegt. Dës gouf den 3. Mee 2022 méi genau presentéiert.

An dësem Kontext géif ech gäre folgend Froen un den Här Minister fir Educatioun, Kanner a Jugend stellen:

- Wéi ass d'Berufsbild vum „DAP Education“ definéiert? Laut dem Informatiounsflyer „DAP Education – Meng Ausbildung, Meng Passioun“ kann ee mat dëser Ausbildung a Betreuungsstrukture schaffen, zum Beispill Maison-Relais oder Crèche fir Kanner vun 0 bis 4 a vu 4 bis 12 Joer, donieft och a sozial-pedagogesche Strukturen fir Jugundlecher. Kann den Här Minister dëst confirméieren?
- Am Accord, deen den Här Minister zesumme mat der CGFP de 16. November 2021 ënnerschriwwen hat, gouf festgehalten, dass den „DAP Education“ och an de „Centres de compétences“ intervenéiere géif. Dëst fënnt een an deem uewe genannte Flyer net erëm. Kann den Här Minister bestätegen, dass dëst de Fall ass?
- Wann den „DAP Education“ och an de „Centres de compétences“ agesat ka ginn, a wéi enge Fächer ginn d'Schüler virbereet, fir am Inklusiounssecteur ze schaffen?
- Wéi vill Schoule wäerten den „DAP Education“ ubidden?
- Sinn d'Admissiounen zueleméisseg begrenzt? Wa jo – Wéi vill Schülerinnen a Schüler wäerte maximal pro Schoul ugeholl ginn?
- Wann ee Schüler oder eng Schülerin den „DAP Education“ gepackt huet, wéi eng zousätzlech Ausbildungsperspektiven huet dës Persoun dono? Ginn do Passerellen ugebueden, wéi zum Beispill eng fir dono de Beruff vum „Educateur diplômé“ ze léieren?

- Laut der „Grille d’horaires“ ass den „DAP Education“ als „plein temps“ mat Stage virgesinn, firwat ass bei dëser Ausbildung net de „Régime concomitant“ gewielt ginn ?
- Si genuch Ausbildungsbetriber fir d’Stage bereet, déi di néideg Bedingungen erfëllen ?
- Hunn d’Lycéeën dat néideg Personal fir dësen DAP z’enseignéieren ? Wéi eng spezifesch Enseignantë gi gebraucht ?
- Fir d’Vakanzenaktivitéiten kann an de Maison Relais op Schüler a Studenten zeréckgegraff ginn, déi am Besëtz vun engem Brevet „Aide-Animateur - Niveau A“ sinn. Dëst ënnert der Opsicht vum „Personnel d’encadrement“. Gehéiert eng Persoun mat engem ofgeschlossenen „DAP Education“ och zum „Personnel d’encadrement“ ?

Här President, ech bieden Iech mäin déifste Respekt unzehuelen.



Martine Hansen
Co-Fraktiounspräsidentin



**Äntwert vum Minister fir Educatioun, Kanner a Jugend, Claude Meisch, op d'parlamentaresch Fro
Nr. 6452 vun der honorabeler Deputéiert Martine Hansen**

Ad 1)

Jo, dat sinn déi wichtegst Aarbechtsfelder, an deenen den Agent socio-pédagogique dono schafft.

Ad 2) an 3)

D'Kompetenzzentren (*Centres de compétences en psycho-pédagogie spécialisée*) betreie Kanner a Jonker mat ganz ënnerschiddleche Bedierfnisser; dëst souwuel an de Klasse vun de Kompetenzzentre wéi och an de Grondschoulen an an de Lycéeën. Deemno kéint en Agent socio-pédagogique mat engem *DAP Education* duerchaus och bei der Prise en charge vu Schüler duerch e Kompetenzzenter matschaffen. D'Formatioun vum *DAP Auxiliaire de vie* gëtt am Moment och reforméiert a spezialiséiert op *Personnes à besoins spécifiques*. Den Accord, deem de 16. November 2021 mat der CGFP ënnerschriww gouf, gesäit sengersäits just vir, datt an Zukunft och Agenten mat engem *DAP* kéinten agestallt ginn, ouni awer ze präziséieren, ëm wéi en *DAP* et sech dobäi handelt.

Wéi eng Modullen de neien *Auxiliaire de vie* op seng Tâchen an de Kompetenzzentre virbereeden, kann een haut nach net soen, well d'Formatioun eréischt elaboréiert gëtt. An dat mat all de Parties prenantes aus dem Secteur, dorënner och d'Kompetenzzentren.

D'Betreiung vu Kanner mat spezifesch Bedierfnesser ass natierlech och en Deel vun der Ausbildung *DAP Education*, well och an der Aarbecht an den SEA- oder AEF-Strukture gëtt Inklusioun groussgeschriwwen. D'Schülerinnen a d'Schüler ginn duerfir am Laf vun hirer Ausbildung och dorop virbereet, bei Kanner mat spezifesch Bedierfnisser ze intervenéieren.

Ad 4)

Follgend Lycéeën bidden d'Formatioun *DAP Education* fir September 2022 un:

- Lycée du Nord
- Lycée technique pour professions éducatives et sociales
- Lycée technique de Bonnevoie
- Lycée technique du Centre
- Lycée Nic-Biever
- Lycée Mathias Adam
- Lycée Guillaume Kroll
- Maacher Lycée
- Nordstad-Lycée
- École nationale pour adultes
- École privée Marie-Consolatrice
- École privée Sainte-Anne
- École privée Fieldgen

Des Weidere gëtt och jeeweils eng Klass an deenen zwee CNFPC zu Esch-Uelzecht an Ettelbréck opgemaach.

Ad 5)

All Schoul muss fir sech festleeën, wéi vill Schüler pro Klass kënnen opgehooll ginn. Dat hänkt vun de jeeweilege Rahmebedingungen of. Eng vum Educatiounsministère festgeluechte Maximalzuel gëtt et net.

Ad 6)

An der Berufsausbildung gëtt sech ëmmer beméit dem Motto „kein Abschluss ohne Anschluss“ gerecht ze ginn. Vu datt awer keng legal festgeluechte Passerell tëscht der Berufsausbildung an dem Enseignement secondaire existéiert, gëtt et vum *DAP Education* keng automatesch Passerell op d'Formatioun vum Educateur. Et gëtt awer d'Méiglechkeet, fir eng Admissioun sur dossier am Lycée technique pour professions éducatives et sociales (LTPES) oder der École nationale pour adultes (ENAD) unzefroen.

Ad 7)

An de Gespréicher mat de Patronatsvertrieder innerhalb vun der Équipe curriculaire gouf de Wonsch geäussert, datt dës Formatioun an dëser Form sollt ugebueden ginn. Dëst gouf dann och vun der ganzer Equipe curriculaire esou arrêtéiert. Déi verschidde Stagen erlaben et de Schülerinnen a Schüler, en Abléck an déi verschidden Aarbechtsfelder ze kréien an hir Formatioun an d'Praxis ëmzesetzen.

Ad 8)

Eng Institutioun, déi eng Schülerin oder e Schüler an de Stage wëll ophuelen, kann op der Chambre de commerce den Droit de former ufroen. Institutiounen aus dem Kannerberäich, déi bis ewell Auxiliaires de vie ausgebilt hunn, kënnen dann och den Droit de former a vereinfachter Form kréien. Fir den Undrang während de Stageperioden op d'Institutiounen a Grenzen ze halen, ginn d'Stagen zesumme mat de Lycéeën an all Regioun op verschidde Periode verdeelt.

Ad 9)

Aktuell leeft de Recrutement nach. Fir déi fachspezifesch Module gi virun allem Enseignantë mat der Spezialisatioun Pädagogik, Educateur gradué oder Psychologie gebraucht.

Ad 10)

Laut dem *Règlement grand-ducal* vum 14. November 2013 gehéiert den Agent socio-pédagogique zum “personnel d'encadrement” vun enger Maison relais. Dësen Diplom preparéiert déi jonk Leit spezifesch dorop, fir am SEA-Beräich ze schaffen.

Lëtzebuerg, den 2. September 2022

De Minister fir Educatioun,
Kanner a Jugend

(s.) Claude MEISCH